

肴采藥救積自外何事順性靡違法音晨聽放生夕  
歸研書賞理敷文奏懷凡厥意謂楊較以揮且列於  
言誠特此推北山二園南山三苑百果備列乍近乍  
遠羅行布株迎早候晚猗蔚溪澗疎崖森巘杏壇棗  
園橘林栗圃桃李多品梨棗殊所枇杷林檎帶谷映  
渚樾梅流芬於回巒裊柿被實於長浦畦町所莪含  
藥藉芳蓼葳蕤薺菲蘇薑綠葵眷節以懷露白薤  
感時而負霜寒葱標倩以陵陰春藿吐茗以迎陽弱  
質難恒積齡易喪撫鬢生悲視顏自傷承清府之有  
術冀在衰之可壯尋名山之奇藥越靈波而憩轅采

石上之地黃摘竹下之天門撫曾嶺之細辛拔幽澗  
之溪蓀訪鍾乳於洞穴訊丹陽於紅泉安居一時冬  
夏三月遠僧有來近衆無關法鼓朗響頌偈清發散  
華霏蕤流香飛越折曠劫之微言說像法之遺旨乘  
此心之一毫濟彼生之萬理啓善趣於南倡歸清暢  
於北机非獨愜於予情諒僉感於君子山中兮清寂  
羣紛兮自絕周聽兮匪多得理兮俱悅寒風兮搔眉  
面陽兮常熟炎光兮隆熾對陰兮霜雪憩曾臺兮陟  
雲根坐澗下兮越風穴在茲城而諧賞傳古今之不  
滅好生之篤以我而觀懼命之盡委景之懽分一往